

四庫全書

史部

欽定四庫全書

平定準噶爾方略前編卷十二

雍正元年秋八月甲子

敘平藏功

兵部分別議敘陝西四川雲南官兵平定西藏
功奏入得

旨平定西藏乃自古未至之絕域所以

皇考曾有從優議叙之

旨況

皇考當春秋高邁備兵於極邊宣揚威略峻德鴻功允垂億萬斯年之美政也此一次議叙軍功前固無例可援後亦不得為例將軍延信著封為貝勒兩路率領八旗官員進勦之將軍等著給與世襲三等輕車都尉叅贊大臣給與騎都尉副都統營總等給與雲騎尉其護軍校驍騎校給與頭等功牌二面仍加一級綠旗官員經大將軍等咨送冊開頭等者照攻取

打箭爐功加一倍二等者功加五等三等者功加二
等至於滿洲漢軍綠旗之外委官俱係一體効力人
員無論由部委外委概行從優議敘以仰副我
皇考恩綸特沛從優議敘之

諭旨

丙寅

命賞察哈爾厄魯特散秩大臣羅卜藏錫喇卜等來謁
梓宮者馬匹行糧

庚午

侍郎常授奏青海情形

常授奏言臣於七月二十二日抵沙拉圖至親

王羅卜藏丹津駐牧處恭宣

諭旨令若等兄弟罷兵和睦據羅卜藏丹津訴言戴青
和碩齊察罕丹津額爾德尼額爾克托克托鼐
欲據招地詭言我遣使準噶爾與策妄阿喇布
坦背叛欲讒害我是以衆台吉等不服會盟興

兵且備言戴青和碩齊察罕丹津等過惡擬於
數日渡河與決勝負情形如此勢難歸好後據
察罕丹津訴言羅卜藏丹津興兵逐額爾德尼
額爾克托克托鼎於內地脅衆台吉稱兵於巴
爾托羅海其意欲獨有西招青海之地計其兵
不過萬二三千其黨率多脅從若渡河來我當
盡力拒之又據衆蒙古來言羅卜藏丹津脅令
諸部呼已為達賴混台吉其餘台吉悉呼故號

不得稱王貝勒貝子公封號其意先滅額爾德
尼額爾克托克托鼐次滅察罕丹津然後集衆
台吉奏請賜彼汗號駐劄招地遙制青海叛形
已見臣問其遣使準噶爾消息或云聞準噶爾
以青海人等不足信又云準噶爾兵聞已至噶
斯口度九月可至青海臣謹即所見情形與羅
卜藏丹津所呈蒙古字奏章二冊並與臣蒙古
字書一封密奏奏入得

旨此事甚大行在總理事務王大臣議政大臣詳議并
發往在京之總理事務王大臣議政大臣等詳議具
奏

甲戌

命川陝總督年羹堯辦理西路軍務

總理事務王大臣等遵

旨議奏曰羅卜藏丹津久蓄異心糾衆盟誓

皇上念其祖顧實汗恭敬效順不即加誅特遣侍郎常

授往諭以利害為之和解羅卜藏丹津不聽其
言欲與戴青和碩齊察罕丹津交戰又欲要請
汗號且自稱為達賴混台吉背逆莫甚今方欲
往察罕丹津處決戰應調西寧兵俟羅卜藏丹
津兵涉黃河即於渡口截其後路且請令提督
岳鍾琪率松潘兵往援以張聲勢其西路軍務
應令年羹堯詳議辦理奏入

上從之

駐劄西寧侍郎常授奏報青海親王戴青和碩
齊察罕丹津來奔河州

常授奏言親王戴青和碩齊察罕丹津率兵與
羅卜藏丹津相持久之不敵率妻子及所屬百
四十餘人至河州老鴉關外臣即令入居邊內
餘人令其宰桑約束於邊外要隘防守奏入報

聞

丙子

諭蒙古諸王貝勒貝子扎薩克台吉塔布囊等

上諭曰自爾先世歸附

太祖

太宗蒙被聖化於茲五六代矣世締國姻恩深祿重兄弟主臣洽比保聚安居樂業百有餘年其間厄魯特噶爾丹猖獗弄兵破喀爾喀七旗侵及內扎薩克蒙古蹂躪游牧之地

皇考為爾等三次自將出師乃滅噶爾丹使爾等永享

太平之福六十餘年以來爾等屬下偶有饑饉災傷
莫不發帑與糧資給畜牧更派富戶屯田代耕使饑
者復安散者復聚

皇考養育爾等蒙古恩澤重矣大矣曩者和洛霍漸以
歲饑聞朕仰體

皇考聖意即遣大臣前往發倉賑救賞給牛羊今喀喇
沁翁牛特八旗又以歲饑聞復遣大臣前往即速查
明饑口動用正項錢糧買米散賑夫一時阻饑朕雖

賑之常年貧乏之民在爾各君長於本旗內裒多益寡互相賙恤以養育之庶幾得所耳若仍然厚斂重徭納之於阡危之域使之至於散亡孰為爾等納賦孰為爾等供徭愛民惠下是第一要務不可不知也連歲灾旱頻仍今年又遭饑饉爾等各子其民者如何減賦如何輕徭如何裕其農功如何孳其畜牧爾等王貝勒大臣等議定務使各得生理以仰副我皇考聖心以慰朕心定議之後倘有顯背公議仍然重

賦苛役者國法具在非朕所得而私也我

皇考目覩爾等長成愛如子孫事事包容處處軫恤爾等視

皇考如祖父恃

皇考之慈愛每事懈怠朕新即位務須各盡爾職謹慎
小心管轄屬下訓練兵丁嚴禁盜賊奉公守法循分
安生仰報我

皇考軫愛之恩俾朕得以仰法

皇考慈惠爾等至意始終保全永永勿替朕之願也今日特於

皇考梓宮前諭爾等知之

九月甲申

賜準噶爾降人博羅特達什扎卜侍衛翎

理藩院奏言準噶爾策妄阿喇布坦屬下明噶

特人博羅特達什扎卜巴圖蒙克多爾濟哈喇

瑪克達巴什六人來降奏入得

旨若等來歸可嘉其博羅特達什扎卜率先向化著賜
與侍衛翎若等稱有近族兄弟在貝勒博貝處為護
衛即以此六人給與博貝加意撫輯

丁亥

命川陝督標中軍副將田畯為陝西涼州總兵官赴軍
協助提督路振聲辦事以陝西固原提督楊盡
信署理涼州總兵官

己丑

命川陝總督年羹堯

上諭年羹堯曰侍郎常授奏報親王羅卜藏丹津攻王
察罕丹津已渡黃河肆行猖狂或遣使於策妄阿喇
布坦約期作亂或欲窺取西藏皆事所必有軍務宜
預先籌度爾宜令西寧松潘甘州等處軍兵整備務
期勦滅羅卜藏丹津自夏間作亂以來人馬疲乏若
不乘時擊之遲延日久則賊人得以蓄養氣力爾其
盡心籌畫克奏膚功

辛卯

議撤阿爾台諸路兵

上諭川陝總督年羹堯曰目今策妄阿喇布坦甚屬恭順我兵在外已久著將阿爾台兵丁如何撤回永固疆圉應駐兵若干駐劄何處或作戍兵迭更或令永遠駐防應將何處兵丁移駐爾等可詳加確議具奏再吐魯番巴里坤布隆吉爾等處兵丁俱著照此行

丙申

以軍前副將軍阿喇衲為鑲紅旗蒙古都統

乙巳

卹贈台吉進達克為頭等台吉封其子噶爾瑪
遜多卜為輔國公

理藩院奏言台吉進達克陣亡蒙

恩優卹典其子噶爾瑪遜多卜等謝

恩奏入得

旨蘇尼特王吹濟拱蘇隆旗下台吉管理旗務官進達

克率所屬兵與厄魯特逃者羅卜藏錫喇卜等鏖戰
身亡甚屬可嘉此並非出兵時亦未嘗令其率衆追
賊也而進達克奮勇前行臨敵致命朕用交部議叙
部議二等台吉加一等當授為頭等台吉具奏朕已
特降諭旨施恩其子噶爾瑪遜多卜著授為輔國公
冬十月戊申

以川陝總督年羹堯為撫遠大將軍貝勒延信
為平逆將軍

上諭兵部曰據川陝總督年羹堯奏稱青海羅卜藏丹
津恣肆猖狂臣領兵於九月二十日自甘州起程十
月初間至西寧相機行事等語總督年羹堯既往西
寧辦理軍務其調遣弁兵之任甚屬緊要須給大將
軍印信以專執掌著將貝勒延信護理之撫遠大將
軍印即從彼處送至西寧交與總督年羹堯其貝勒
延信現有防守甘州沿邊等處事務將庫內現存將
軍印信著該部請旨頒發一顆送給尋議曰應以平

逆將軍印授貝勒延信奏入

上從之

勅諭撫遠大將軍年羹堯

上諭曰我朝自創業以來皆效法

列祖用兵紀律無往不施仁德孟子云仁者無敵統兵者之大義莫要於此羅卜藏丹津係青海一台吉自

乃祖顧實汗歲時請安進貢至扎什巴圖爾台吉慕

聖祖仁皇帝德化叩覲

天顏蒙

聖祖仁皇帝念及顧實汗從前敬謹恭順晉封扎什巴圖爾為親王疊沛隆恩及病故後令其子羅卜藏丹津襲封羅卜藏丹津宜仰體寵眷效法祖父敬奉法紀乃妄逞強梁弟兄骨肉自相仇敵欺陵親王戴青和碩齊察罕丹津郡王額爾德尼額爾克托克托鼐等恣行倡亂朕甫聞其事即遣侍郎常授前往令伊等講和修睦羅卜藏丹津等宜遵朕旨式好無尤乃

肆意稱兵侵襲親王戴青和碩齊察罕丹津郡王額爾德尼額爾克托克托鼐等殺戮抄掠以致察罕丹津等情急投入內境顯負朕恩悖逆天常擾害生靈誅戮不可少緩故加天討遣發大兵以聲羅卜藏丹津之罪朕欲拯救西域生靈大張天威特命爾為撫遠大將軍統領滿洲蒙古綠旗大兵一切事宜爾與蘇丹岳鍾琪常授等酌定方略公同計議而行勿當事會而致失機宜勿恃兵強而輕視逆寇密偵遠探

罔或疎虞各路大兵暨蒙古兵丁聽爾調遣凡遇有
警即遣發官兵應援撲勦防備詐降如羅卜藏丹津
敢於抗拒即行勦滅其黨內亦有懼羅卜藏丹津之
勢脅從其行者伊等果悔罪來歸即行寬宥有能擒
斬羅卜藏丹津來歸者分別具奏有情急來歸者加
意撫恤其不抗拒者無加殺戮須嚴禁將士凡經過
地方勿得騷擾百姓勿離人父子夫婦勿淫人婦女
勿掘人墳墓附降者勿得侵取其物勿拆毀廬舍祠

字勿擾害廟內番僧副朕戡亂靖逆之意官兵或臨陣退縮貽誤軍機爾會同商議官員以下即以軍法從事示衆官兵犯小過者徑行處治勿泯沒官兵功績勿寬縱違犯之人賞罰務極嚴明爾酌量調遣各路大兵將羅卜藏丹津殲勦廓清安靖邊圉斯稱委任爾務宜殫竭心力早奏膚功欽哉故敕

臣等謹案羅卜藏丹津自其祖顧實汗父扎什巴圖爾台吉蒙被

國恩備膺寵賚襲爵親王乃敢猖狂跳梁殘擾青
海諸部罪在不赦

世宗憲皇帝命以川陝總督年羹堯為撫遠大將軍四
川提督岳鍾琪為奮威將軍

親授方略聲討其罪雍正元年十月出師自冬徂春降
其貝勒貝子公台吉等二十餘人及其部衆
無算

聖諭猶以羅卜藏丹津束身來歸可予全宥乃復怙惡

不悛易服投荒子身延喘

天戈所指賊衆大潰羅卜藏丹津之母并其惡黨吹喇
克諾木齊等皆就擒獲獻俘奏凱青海悉平
計師行衆入自雍正二年二月八日至二十
有二日僅旬有五成功之速為史冊所未
有

皇上纘承

先緒耆定西陲

鴻圖式擴羅卜藏丹津逋逃遺孽當伊犁既平並其
子已朗等以涸轍窮鱗籲轅乞命復縻尺組
皇上念邊隅永靖此茆茆殘息不足以膏齊斧復仰

體

世宗憲皇帝來歸全宥之
殊恩待以不死於是益見

聖朝聲靈震疊當日狡焉餘醜雖遲之數十年之久
終不得自逃於

天網而

國家服遠之

神威與綏遐之

至德所由並越隆古也歟

以翰林院侍讀學士綽爾岱辦理北路軍營糧
餉

已酉

復歸化城土默特兩旗都統等官

上諭歸化城都統丹津曰前

聖祖皇考由寧夏親征漠北時巡狩歸化城地見歸化
城土默特兩旗官兵士衆萎靡弓馬不嫻法度廢弛
因將兩旗都統革退選在京都統副都統叅領等員
管轄歷年訓練有方軍律嚴整舊習漸改是以數年
來將在京選用之例停止今爾保送之官兵人等盡
皆弓馬嫻熟且兩旗兵弁行伍整齊凡有行圍及出
征等事與內地兵丁一體効力此皆我

皇考教育所致也歸化城土默特兩旗原在四十九扎薩克內其都統副都統等官皆係國初歸附之土默特功臣子孫世職今既已棄咎從忠允宜遵復舊例楚宗著授京城額外都統楚宗員缺著原任都統阿必達之子副都統根敦補授根敦員缺著丹津將爾兩旗內應補人員與原任都統副都統世家子孫及叅領內人材可用儀表修偉向能管轄兵丁曾經効力行間人等查明保送引見以便簡擢

甲寅

叙平郭羅克功

封川陝總督年羹堯為二等公給四川提督岳鍾琪騎都尉世職遊擊姚文玉周瑛以下十五員及外委官馬萬倉等九十七員並以所得功加二等餘各賞賚有差

壬戌

撫遠大將軍年羹堯奏請以蘇丹岳鍾琪為叅

贊

年羹堯奏言兵自西藏撤還者額駙阿寶所率蒙古兵馬匹軍器並不堪用且阿寶有殘疾應令還所在定西將軍公策旺諾爾布所領察哈爾兵精壯請簡四百人留與都統武格管轄餘令策旺諾爾布率之啟行再都統西倫圖現統京城兵駐東郭爾廟甚無益其兵在外日久馬匹器械並缺乏可令侍衛班領阿齊圖率之還

西倫圖漢仗尚壯請留軍前令管轄察哈爾前
鋒兵西寧現駐滿洲兵無多應令署西安將軍
公普照撥烏鎗驍騎四百前鋒百人令副都統
覺羅伊禮布率赴西寧再者軍中不可無叅贊
大臣前鋒統領蘇丹經事頗多岳鍾琪總統綠
旗土司兵丁請以叅贊授之至青海事並請令
侍郎常授一等侍衛達鼐叅議奏入報

乙丑

以郎中衆佛保為內閣學士使準噶爾

上諭怡親王允祥等曰策妄阿喇布坦來使將至朕亦欲遣使臣與其來使同往理藩院郎中衆佛保著授為內閣學士前去

丙寅

授厄魯特公茂海為固山貝子

上諭理藩院曰厄魯特公茂海與其伯王丹津阿喇卜

坦來時我

皇考深加眷愛授以公爵茂海今在軍前輸誠効力有
年著授為固山貝子

丁卯

撫遠大將軍年羹堯奏調諸路兵

年羹堯奏言青海羅卜藏丹津等煽集各台吉
肆行邊外臣已劄令察木多總兵官周瑛率兵
截其往藏路但羅卜藏丹津急則遁走穆魯烏

蘇等處未定臣令靖逆將軍富寧安調都統穆
森往吐魯番駐防調吐魯番駐防副將軍阿喇
衮率滿洲蒙古綠旗兵二千由噶斯一路截之
若羅卜藏丹津實心歸順即令此二千人暫駐
布隆吉爾再布隆吉爾所在駐兵甚少四圍並
連厄魯特賊人喇卜坦巴蘇泰輒令所屬要奪
我台站馬駝應調綠旗兵二千往布隆吉爾令
叅將孫繼宗管轄若用兵則令率所轄兵勦滅

喇卜坦巴蘇泰與副將軍阿喇衲兵會進勦羅卜藏丹津如此賊人不得逃遁而布隆吉爾所在亦可完固奏入報

聞

癸酉

撫遠大將軍年羹堯奏敗賊於鎮海堡

年羹堯奏言十月十九日賊人來侵鎮海堡臣令都統武格率察哈爾兵西安滿洲兵救之二

十日厄魯特兵二千番賊千餘圍堡自二十一
日至二十三日賊益增兵日夜轉戰臣以前鋒
統領蘇丹所率兵令叅將宋可進等將之並率
軍前効力滿洲綠旗等官於二十五日往援賊
衆六千餘人或據堡前山上或伏谷中我兵分
隊攻賊賊中斃死者甚衆賊走鎮海堡中滿洲
察哈爾綠旗兵盡出截擊賊人四向逃去所殺
傷賊六百餘我軍陣亡五人被傷者六人又多

巴之囊素阿旺丹津前叛歸羅卜藏丹津今已
為我擒當正法以軍務未畢暫令監禁奏入報
聞

十一月戊寅

撥鄂爾多斯等處兵協駐甘州

撫遠大將軍年羹堯疏言羅卜藏丹津率衆數
千攻入西寧之南川口會守口兵少守備馬有
仁等據申中堡禦之賊圍堡堡人囊素將鑿牆

以納賊臣令叅將宋可進遊擊元繼善等往援賊還兵迎戰我師出堡夾攻殲賊九十餘人賊遁去囊素與賊通已誅之所獲器械馬匹給與兵丁我兵陣亡七人即加賞卹俟諸路兵調集臣即日相機勦滅方今甘州兵少力弱乞調喀爾喀額爾德尼王各扎薩克蒙古兵三千協駐甘州以壯軍勢總理事務王大臣等議覆曰喀爾喀等雖近甘州但方冬嚴寒所在散處調之

勿便請就近撥鄂爾多斯兵五千副都統花色
等領之歸化城土默特兵五百副都統查克旦
領之大同鎮兵一千總兵官馬覲伯領之令往
駐甘州奏入

上從之

丙戌

命議叙北川新城及莊浪等處破賊官兵

撫遠大將軍年羹堯奏言有賊二千餘據北川

新城遊擊馬成輔攻之多所擊殺臣令副將王
嵩等以兵三千助之賊扼山相拒我兵奪擊破
其六營賊敗走又莊浪當河西五路要害東西
兩山賊人游牧所出入賊中謝勒蘇種最強額
勒布種助之為害高山密林以為巢穴其妻子
山茨爾溝兩地尤險惡臣調集涼州及土司魯
華齡兵各鄉兵凡四千令涼州總兵官楊盡信
等率之四面仰攻斬賊數百級俘其妻子賊奔

入鐵保城生擒額勒布賊首魯木受等及謝勒
蘇賊首坎柱等俱正法我軍陣亡者守備王福
晉把總陳昌及兵丁二十餘人其被傷者俟核
實奏報奏入得

旨據奏侵犯西寧之南川西川鎮海堡北川等處逆賊
厄魯特羅卜藏丹津被官兵協力奮攻勦殺殆盡賊
衆墮膽逃竄並將莊浪等處截路行劫之賊番擊敗
擒獲大將軍年羹堯調遣指授官兵俱各奮勇實心

効力殊屬可嘉此次立功報効陣亡受傷官兵俱著
註冊俟事平之日該部從優議叙

丁亥

撫遠大將軍年羹堯奏撫勦西寧北川回人及
移察罕丹津於蘭州

年羹堯奏言蒙古回人據有西寧北川上北塔
下北塔兩地數百里潛蓄異心臣今千總馬中
孝往下北塔招下其三十村莊令率兵一千勦

上北塔獲其頭目阿卜多烏園額爾克喀等正
法餘人悉降馬中孝等請俟大兵凱旋議叙又
奏言察罕丹津向住河州苦為羅卜藏丹津所
劫臣令少卿花善率察罕丹津妻子及其屬人
移住蘭州奏入報

聞

靖逆將軍富寧安奏報吐魯番等處屯田收穫
麥糜九千三百三十石有奇奏入得

旨下部知之

辛卯

命封青海台吉索諾木達什為貝子

上諭理藩院曰據大將軍年羹堯奏稱青海台吉索諾木達什在布隆吉爾地方由羅卜藏丹津處脫身來歸等語向者索諾木達什盡忠効力乃被羅卜藏丹津誘擒今聞伊來歸良慰朕懷索諾木達已什先與駐劄柴達木地方之官兵一處効力繼又往西藏軍

前竭誠報國深屬可嘉特沛殊恩著封為貝子給與上等產業加意撫綏併著大將軍傳諭俾知朕意

癸巳

撫遠大將軍年羹堯奏勦賊番於奇嘉寺

年羹堯奏言厄魯特番賊往來劫奪新城堡等

處守備李國強外委馬光永陣亡把總李孝被

傷臣調西寧總兵官黃喜林等率兵進勦羅卜

藏察罕等賊殺奇嘉寺賊五百喇嘛番子千餘

獲賊頭目七人器械馬匹牛羊無算方冬寒
臣
令黃喜林等撤兵至西寧奏入報

聞

己亥

命鑄辦理布拉罕軍前糧餉事務關防給翰林院侍讀
學士綽爾岱

議進勦青海事宜

撫遠大將軍年羹堯奏言進勦青海一請備兵

請選陝西督標西安固原寧夏四川甘州大同
榆林土默特鄂爾多斯巴里坤吐魯番等處兵
凡一萬九千令提督岳鍾琪等分領之由西寧
松潘甘州布隆吉爾四路進剿一防守邊口令
土司兵二千及西寧滿洲兵五百留守西寧各
邊口陝西撫標兵五百防守永昌西安滿洲兵
五百防守甘州其布隆吉爾舊有兵一千應仍
留駐防至副將張成龍現率兵五百防守巴塘

其里塘駐防兵僅五百請以四川撫標兵三百
益之再令署松潘鎮副將張英副都統黑色率
兵一千五百出松潘口駐劄黃勝關雲南提督
郝玉麟率兵二千駐劄察木多則羅卜藏丹津
等必不敢至巴爾喀木等處矣一購買馬駝臣
於陝西買馬一千不足用請於歸化城張家口
採買或請以太僕寺商都達卜遜淖爾孳生馬
匹撥送三千匹巴里坤選駝二千甘涼肅州等

處採買一千五百赴軍則於兵丁進勦之期無
悞一貯備軍糧臣在西安慮青海有事已預買
米六萬石為備一精煉火器請以景山所製火
藥給軍並給駝一百每駝載百八十觔於明年
正月送至西寧奏入得

旨總理事務王大臣議政大臣會議具奏尋議曰大將
軍條奏事宜悉應如所請其所請馬數外增送
一千匹火藥於所請數外增給一培再行文郝

王麟令由中甸率兵往察木多駐劄其中甸應
令總督高其倬選總兵官一人率兵五百駐劄
奏入

上從之

壬寅

命撥振武將軍傅爾丹營兵赴巴里坤駐劄以傅爾丹
兼統祁里德軍征西將軍祁里德為叅贊

上諭總理事務王大臣等曰撫遠大將軍年羹堯進勦

羅卜藏丹津將巴里坤吐魯番兵調往五千名朕恐
巴里坤兵力單弱著於振武將軍傅爾丹軍營兵丁
內撥派二千名令前鋒統領丁壽都統根敦帶領於
明年二月內前往巴里坤駐劄總理事務王大臣等
議曰傅爾丹營中兵既撥往巴里坤阿爾台兵
少不敷調遣請以祁里德所領兵與傅爾丹軍
合以一將軍統之奏入得

旨兩處將軍倘有合行處著傅爾丹總統祁里德令在

叅贊上行走

以翰林院侍讀學士綽爾岱為內閣學士兼禮部侍郎仍留軍前辦理糧餉事務

甲辰

召諭策妄阿喇布坦使臣


策妄阿喇布坦使臣根敦等朝見

上召入諭曰爾台吉於

聖祖皇考時有獲罪之處亦有效力之處爾台吉今悔

過引罪朕甚嘉之所貢方物朕酌量收納俟爾回日

另降勅諭



平定準噶爾方略前編卷十二

欽定四庫全書

史部

平定準噶爾方略前編卷十三至十六

詳校官監察御史

臣孫家賢

通政使司副使

臣莫瞻菴覆勘

總校官進士

臣

朱鈐

校對官中書

臣

李斯咏

謄錄監生

臣

李亭植

欽定四庫全書

平定準噶爾方略前編卷十三

雍正元年十二月戊申

議叙軍前効力蒙古人等功

封厄魯特多羅貝勒額駙阿寶為多羅郡王台

吉沙畢多爾濟為固山貝子喀喇沁一等塔布

囊噶爾瑪色楞扎薩克一等台吉沙克都爾扎

卜並為輔國公餘各擢賞有差

巳酉

靖逆將軍富寧安奏報巴里坤屯田收穫青稞
二萬一千六十石有奇奏入得

旨下部知之

癸丑

安插察罕丹津等屬人來歸者

撫遠大將軍年羹堯奏言王察罕丹津屬下額
爾克扎爾固齊阿勒達爾和碩齊拉布木三人

共殺羅卜藏丹津之守者率其戶口千餘來歸
貝勒塞卜騰扎爾率青海左翼公策凌之弟台
吉巴爾珠爾等及其屬人二千來歸臣即宣布
皇仁赦其脅從之罪安插於西川口外尋又奏言察罕
丹津之壻喇卜坦宰桑巴圖等屬下千四百餘
戶及丹衷屬下七百餘戶並自羅卜藏丹津處
脫身來歸仍令歸其所部奏入報

聞

戊午

撫遠大將軍年羹堯奏請訊勘墨爾根戴青拉
察卜父子及誅堪布諾們汗

年羹堯奏言墨爾根戴青拉察卜二子察罕喇
卜坦旺舒克喇卜坦率衆來投云我父墨爾根
戴青拉察卜聞大兵來已脫奔巴爾喀木矣又
堪布諾們汗亦率所屬來臣以墨爾根戴青拉
察卜嘗助羅卜藏丹津刦掠察罕丹津有罪已

令其子遣人招之到日勘實請

旨堪布諾們汗乃近邊塔兒寺喇嘛且察罕丹津之姪
也既煽羅卜藏丹津為叛又敢令喇嘛與我兵
戰勢窮來投罪不可貸到日即正法奏入報

聞

辛酉

命賞給諸路軍前兵丁行糧一月

撫遠大將軍年羹堯奏敗賊於布隆吉爾進勦

郭密諸部

年羹堯奏言賊兵三千餘人來侵布隆吉爾叅
將孫繼宗遊擊孫超節率兵迎戰兵既交副將
潘至善以兵至併力擊賊殺傷甚衆所獲器械
無算尋又奏言西寧一帶番賊已勦滅惟南川
口外郭密九部肆行剽掠臣先招下其沙克都
爾阿喇卜坦等三部餘部肆掠如故其呈庫和
爾嘉二部暴橫尤甚岳鍾琪所率瓦斯雜谷兵

熟習山路臣前令岳鍾琪往歸德堡於上寺東
策卜下寺東策卜賊番助惡者或勦或撫各已
安插即移師進勦郭密番賊搜其巢穴呈庫一
部攻殺略盡和爾嘉諸部首惡已誅餘衆悉降
奏入報

聞

雍正二年甲辰春正月丙子朔

策妄阿喇布坦使臣根敦等隨班朝賀行禮

上命賜宴

丁丑

諭免烏梁海民借餉

上諭理藩院曰朕問貝勒博貝管轄之烏梁海人民近時何以資生據奏在將軍祁里德處借餉一萬八千五百六十兩買牲分給各得產業今勝於昔其所借餉銀伊將俸銀逐年抵補等語朕思博貝歷年宣力勲績卓然且烏梁海等衆均係朕之百姓豈有養育

朕之百姓而借餉於朕之理所借銀兩不必扣還著
行文將軍祁里德知之

命治侍郎常授罪議叙筆帖式多爾濟

先是千總馬超羣從侍郎常授往羅卜藏丹津
處超羣還言羅卜藏丹津與常授約於察罕托
羅海會議常授行至和爾處會日暮有賊二三
千人突至刦常授及輜重去筆帖式多爾濟憤
激抽刀自刎常授被執在堪布廟中至是撫遠

大將軍年羹堯奏言十二月十三日羅卜藏丹
津送侍郎常授回營并呈奏章一函筆帖式多
爾濟仗節捐軀請予優卹奏入得

旨侍郎常授乃簡任西寧辦理青海事務之員伊並不
將羅卜藏丹津謀叛情形奏聞一切軍務悉推諉於
年羹堯又擅棄西寧輕往青海為羅卜藏丹津所獲
及羅卜藏丹津將伊釋放復覲顏生還溺職已甚著
將常授拿解西安監禁至筆帖式多爾濟被賊擒獲

不屈身死甚屬可嘉著交部照殉節例議叙仍著大將軍年羹堯照例予祭

戊寅

命撫遠大將軍年羹堯申討羅卜藏丹津及其同謀逆黨

上諭年羹堯曰朕前曾降旨羅卜藏丹津被困時必將常授送回請罪今果將常授送回矣羅卜藏丹津從此又以甘言巧懇阻滯吾兵亦未可定羅卜藏丹津

乃辜負國恩與吾兵對敵之叛賊國法斷不可宥不得因伊曾封王爵稍存疑慮再與羅卜藏丹津同謀之王貝勒貝子公等既經背叛其爵即宜削除伊等或來歸順或被擒獲不必更論其先曾封爵但論其行事之輕重可寬者從寬應治罪者治罪辦理奏聞

甲申

勅諭中外喇嘛

上諭理藩院曰西海逆賊羅卜藏丹津一事喇嘛等理

宜將叛亂之人善言開導令其和輯不致起事戕害
生命是為維持佛教如其不能亦應呈明該將軍等
各自閉戶安居豈意反助西海悖逆之人竟糾合數
千喇嘛手持兵刃公然抗拒官兵及至潰敗猶不降
順入廟固守以致追殺覆滅有玷佛教甚矣欽惟

太宗文皇帝時第五輩達賴喇嘛遣使入覲極為恭順
及

世祖章皇帝時將第五輩達賴喇嘛延至京師封為瓦

齊喇達喇達賴喇嘛蒙被殊禮百年以來法教興隆
皆我朝之恩賜也前者準噶爾寇犯招地殺戮僧徒
折毀寺廟

聖祖仁皇帝遣發大軍恢復招地俾達賴喇嘛重安法
座佛教復興如此隆恩喇嘛並不感激反助悖逆之
人凶惡已極於佛門之教尚可謂遵受奉行者乎將
朕此旨遍諭各處寺廟喇嘛并住居蒙古扎薩克處
之大小喇嘛等知之

丙戌

賞給巴里坤滿洲察哈爾綠旗種地兵丁銀兩有差

丁亥

授四川提督岳鍾琪為奮威將軍

戊子

封喀爾喀鎮國公策旺諾爾布為固山貝子

辛卯

命賞副將孫繼宗破青海賊功

上諭兵部曰副將孫繼宗領兵在布隆吉爾等處同遊擊潘至善大敗青海逆賊孫繼宗著賞給總兵官職銜俟有陝西總兵缺出題補

壬辰

命鑲白旗蒙古都統武格總管殺虎口至阿爾台一路軍臺事務

癸巳

上諭總理事務王大臣等曰額駙策凌奏稱伊自阿爾

台軍營來時副都統勒欽圖原任將軍席柱年俱衰邁原爵公德瞻在軍營患病請將此三人撤回等語席柱勒欽圖著撤回德瞻係前往効力贖罪之人俟軍務告竣再令伊回京

甲午

撫遠大將軍年羹堯奏破喇嘛於郭隆寺

年羹堯奏言章嘉胡土克圖瑚畢勒罕住西寧東北郭隆寺所屬喇嘛甚衆與羅卜藏丹津阿

喇卜坦溫布陰相結好今年正月郭隆寺喇嘛
忽羣聚演兵臣方行禁止而寺中喇嘛號召東
山一帶番人約於十一日拒戰臣見反狀已露
即遣提督岳鍾琪會同前鋒統領蘇丹副都統
覺羅伊禮布等統兵進勦兵未到郭隆寺而賊
衆已於十二日駐營哈喇直溝迎戰我軍直前
衝擊斬賊數千據其三領焚其十寨副將宋可
進總兵官吳正安黃喜林等各有斬獲沿途又

焚其七寨及所居屋七十餘所次日抵郭隆寺
外繞寺並山谷伏賊千餘望見我軍悉入洞逃
匿我兵鎗礮並發益薪縱火焚之賊盡熏死計
前後殺賊六千餘燬郭隆寺并詰問章嘉胡土
克圖瑚畢勒罕消息諸喇嘛已先期挾之往大
通河西雜隆處矣臣即取達克瑪瑚土克圖斬
之此次効力官兵及陣亡被傷者核實咨部奏
入得

旨効力官兵俟事竣議叙其勞績尤著之官弁俱著加銜二等

辛丑

封喀爾喀一等台吉衮布扎卜為輔國公

癸卯

喀爾喀多羅貝勒恭額喇卜坦卒封其子佛保為固山貝子

二月丙午

喀爾喀扎薩克多羅貝勒吹扎木榮卒以其子
納木扎爾車素隆襲爵

壬子

撫遠大將軍年羹堯請分路進剿羅卜藏丹津
年羹堯奏言青海貝勒羅卜藏察罕貝子濟克
濟扎卜台吉哀布色卜騰納罕伊什來歸羅卜
藏察罕之母率諸部妻屬及貝勒策零敦多卜
之姊悉至西寧隨給予茶葉大麥等物令往口

外駐劄臣思羅卜藏丹津欲威脅諸部以益兵力衆心未服若不乘機進兵則來投之人勢難保全臣令提督岳鍾琪總兵官吳正安黃喜林侍衛達鼎副將王嵩宋可進紀成斌等率兵六千分路進剿前鋒統領蘇丹留西寧軍營辦事奏入報

聞

戊午

命議阿爾台撤兵駐防事宜

上諭總理事務王大臣等曰青海之事不日告竣而策妄阿喇布坦亦屬恭順其撤回各路之兵及固守地方之事應預行定議額駙策零貝勒博貝俱在阿爾台駐劄年久地方情形皆所悉知現皆在京可詳詢阿爾台一路兵丁如何撤回及駐防兵丁應於何處安設之處確議具奏尋議曰策妄阿喇布坦以使臣吹納木喀既還中心悅服遣使復來意甚恭順

然永固邊陲之策不可不預為籌畫方今阿爾
台一路振武將軍傅爾丹軍中兵三千八十二
人征西將軍祁里德軍中兵六千九十八人並
應撤回前奉

聖祖仁皇帝諭旨喀爾喀邊疆係與策妄阿喇布坦及
俄羅斯接壤交將軍及喀爾喀王等會議時議以茂
岱察罕廋爾扎克拜達里克二地並要害宜駐
兵已即其地築城後以烏蘭古木地廣土肥可

以屯田乃遣哨兵治城屯駐但烏蘭古木直抵
阿爾台山與茂岱察罕度爾扎克拜達里克及
喀爾喀游牧所在相隔千里不便請罷之仍於
茂岱察罕度爾扎克拜達里克兩處撥滿洲兵
二千防守四年而代蒙古兵二千永駐其地滿
洲兵於京城佐領下選一千七百四十二人不
足則以八旗漢軍礮手充補蒙古兵於八旗游
牧察哈爾佐領下選一千人右衛佐領下選七

百人不足則以歸化城土默特佐領下兵丁撥補凡兵四千令一將軍一副都統領之將軍駐劄察罕度爾副都統駐劄扎克拜達里克令所司鑄給將軍印信其察哈爾右衛歸化城蒙古兵二千設總管等管轄令於兩城左右游牧駐劄阿爾台軍前現有喀爾喀扎薩克兵二千請暫留駐令王丹津多爾濟額駙策凌貝勒博貝等統領調遣丹津多爾濟應鑄給管轄喀爾喀

左翼兵丁副將軍印信策凌應鑄給管轄喀爾
喀中路兵丁副將軍印信博貝應鑄給管轄喀
爾喀右翼兵丁副將軍印信軍營一切鎧仗令
兵部工部製給俸餉馬駝等物令戶部支賞京
城滿洲兵於明年四月啟行令將軍副都統率
之出張家口由中路察喀爾右衛歸化城兵令
總管率之擇便宜游牧而前其兩地屯田俟將
軍到撥兵耕種令官商范毓韻等輓輸米石以

備支給口糧之用其屯種事務奏遣大臣一人
辦理鑄給辦理茂岱察罕度爾扎克拜達里克
兩處兵餉關防更四年與將軍俱代再請令傳
爾丹於阿爾台兩路選兵五千留駐其餘令征
西將軍祁里德於今年七八月統領撤回并上
征西將軍印敕至阿爾台所設軍台道路荒僻
且戈壁遼濶水草不佳查張家口去珠勒輝翁
吉推河甚近水草充裕請遣大臣一人從此路

移設臺站庶於兵丁畜牧均有裨益奏入得

旨爾等所議令傅爾丹處暫留兵五千名阿爾台既有喀爾喀之兵著留四千名餘依議并行文大將軍年羹堯知之

撫遠大將軍年羹堯奏獲阿喇卜坦溫布等賊年羹堯奏言據岳鍾琪報二月初八日率兵出口聞巴爾珠爾阿喇卜坦在烏蘭博爾克即分兵三路進剿比到賊已遁去遂令總兵官吳正

安由北路總兵官黃喜林副將宋可進由中路
岳鍾琪侍衛達鼐由南路率兵追賊副將王嵩
紀成斌各率兵搜山岳鍾琪追至伊克喀爾吉
阿喇卜坦溫布竄入哈爾吉山中我兵入山獲
之黃喜林亦擒獲巴爾珠爾阿喇卜坦及其叔
伊克喇卜坦趣令追賊首羅卜藏丹津勿脫即
攜所擒獲阿喇卜坦溫布等三賊進勦并收撫
逃散部落奏入報

聞

已未

予陣亡原任湖廣總督額倫特祭葬諡忠勇
先是

上命兵部議叙總督額倫特兵部議奏應給騎都尉兼
一雲騎尉額倫特前以招摩多功已給雲騎尉
應并為三等輕車都尉令其長子愛三承襲請
諡忠勇至是予諡

特賜祭葬且

命入昭忠祠

甲子

撫遠大將軍年羹奏擒阿岡部落賊番

年羹堯奏言羅卜藏丹津背叛阿岡部落賊番

輒採取內地信息報之臣令涼莊道蔣洞等率

兵四路進剿斬獲人口牲畜無算即取賊首阿

岡囊蘇正法奏入得

旨蔣洄著加按察使銜

丙寅

中甸番夷內附

雲貴總督高其倬疏言中甸故屬麗江後為青海所據嘗受逆賊羅卜藏丹津偽劄臣遵

旨令提督郝玉麟率兵駐其地番夷悉上所受偽劄歸誠納土現在安撫其人清理疆界奏入得

旨郝玉麟遵旨率兵至中甸揚威駐劄宣布德意中甸

番夷頭目歡忭感激率衆三千五百戶男婦一萬七千五百名喇嘛一千十四人投誠納土高其倬復遣官安撫殊屬可嘉俟青海事竣之日議叙具奏

撫遠大將軍年羹堯奏擒吹喇克諾木齊屬下都喇勒宰桑及扎什敦多卜之母

年羹堯奏言據岳鍾琪報二月十四日兵至西爾哈羅色知吹喇克諾木齊在天城察罕哈達即進兵擒獲人口牲畜甚衆吹喇克諾木齊於

十四日夜以三百人遁走噶斯其屬下都喇勒
宰桑及扎什敦多卜之母將其所屬人馬竄走
台吉盆蘇克旺扎爾等獲之來獻即各賞予銀
緞令率蒙古兵五百往噶斯路追擒吹喇克諾
木齊并令守備劉廷彥率兵與俱諜知羅卜藏
丹津仍居故所大兵約於十九日直抵賊所在
進勦奏入報

聞

丁卯

撫遠大將軍年羹堯奏勦喇嘛番賊於石門寺
年羹堯奏言據涼莊道蔣洄報石門寺喇嘛琿
囊蘇山丹等所屬多卜藏瑪嘉諸部落詭辭降
我潛與謝勒蘇額勒布兩部逃人倚石門寺為
巢穴往來劫掠臣即令蔣洄率綠旗土司及民
兵分五路薄石門寺奮勇齊發擊殺喇嘛番賊
六百搜獲寺內盔甲五千刀鎗撤袋諸物無算

即火其寺而還奏入報

聞

癸酉

命巴里坤管理屯種事務原任江西巡撫王企靖回籍
以正紅旗蒙古副都統雅圖總理屯種事務

楚克賴納木扎爾內附

撫遠大將軍年羹堯奏言楚克賴納木扎爾率
其子策零敦多卜及屬下一千餘戶來歸

臣給

予茶葉大麥諸物仍令往伊克烏蘭和碩等處
居住奏入報

聞

三月己卯

喀爾喀扎薩克輔國公策凌達什卒以其子敦
多卜額林沁襲爵

癸未

平定青海

撫遠大將軍川陝總督年羹堯奏言二月初八
日遣奮威將軍岳鍾琪率大軍進勦青海逆賊
羅卜藏丹津由布爾哈屯直抵賊巢額穆訥布
隆吉爾處分兵一千到北路柴達木斷賊走噶
斯路岳鍾琪率兵出南路尾賊後二十日諜知
賊衆逃往烏蘭穆和爾我兵跡之賊復逃往柴
達木又分兵一千追賊大軍隨之進擊擒獲羅
卜藏丹津之母阿勒泰喀屯及其妹夫格勒克

濟農藏巴濟扎卜等并人口牛羊無算二十二
日軍至柴達木羅卜藏丹津率二百餘人逃匿
即分兵至烏蘭白克擒獲吹喇克諾木齊扎什
敦多卜盡收其人戶駝馬其助亂之八台吉等
悉擒之羅卜藏丹津母及賊黨阿喇卜坦溫布
等八人並降者盆蘇克旺扎爾等四人俱檻送
軍前青海部落悉平奏入報

聞

甲申

命策平定青海功賞賚官兵有差

上諭總理事務王大臣等曰青海逆賊羅卜藏丹津之事大將軍年羹堯奮威將軍岳鍾琪以及兵丁皆奮勇殺賊於十五日內即能將逆賊勦滅平定殊為可嘉年羹堯著授為一等公再賞一子爵岳鍾琪授為三等公凡効力官兵俱加優恩策勲外著戶部動用錢糧二十萬兩送至大將軍年羹堯處分別官兵効

力等次賞給以示格外加恩之意

封大將軍年羹堯之父年遐齡為一等公加太傅銜賜緞九十疋

乙酉

命原任將軍宗扎卜總管殺虎口至阿爾台一路軍臺並辦理遷置臺站事務

丁亥

以平定青海

命詳定告功

祀典

裕親王保泰等遵

旨議曰平定青海應如平定吳逆噶爾丹例遣官告祭

天

地

宗廟

社稷

永陵

福陵

昭陵

暫安奉殿

孝陵

孝東陵

景陵并

奉先殿奏入得

旨是尋各遣官所在告祭如禮

命內閣學士鄂賴自藏至西寧辦理蒙古事務

壬辰

勅諭策妄阿喇布坦

上勅諭準噶爾台吉策妄阿喇布坦曰爾前者無故侵擾我哈密疆界罪在不赦

皇考聖意止令於邊地防守雖各路發兵原無剿滅準噶爾之意也其後哲卜尊丹巴胡土克圖為爾奏懇

皇考欲施恩寬宥所以遣使楚揚託音等諭爾前年爾所遣吹納木喀布窄等至哲卜尊丹巴胡土克圖處轉至總督年羹堯軍前送至京師朕定爾平生功罪開示大義面諭遣回今爾深省前非歸誠請罪遣使根頓同楚揚託音前來奏辭恭順得遂

皇考初心朕意嘉悅爾所奏稱惟祈休養生靈闡揚正教為第一要務等語爾台吉不過準噶爾一部落之主尚欲休養生靈闡揚正教何況朕為四海臣民之

主普天之下皆朕土率土之濱皆朕臣乎用是特遣
御前總管京城喇嘛班第副扎薩克大喇嘛達爾漢
楚揚託音內閣學士衆佛保副都統扎什喇嘛錫喇
卜格楚爾等宣諭若台吉果欲輯寧爾國尚其誠一
乃心與朕所遣大臣等申定疆圻諸事循理妥議歸
於和順朕必施恩軫念永加眷顧仍前通市使命往
來爾台吉誠能以鮮終為戒其必惟和惟順無貳無
疑披瀝悃忱以期永好不特克協於朕休養生靈至

意爾台吉游牧地方亦永永無虞安居樂業矣特此諭示並賜各色緞二十七疋爾其祇承

撫遠大將軍年羹堯奏擊敗阿喇卜坦蘇巴泰等

年羹堯奏言據副將軍阿喇納報阿喇卜坦蘇巴泰等要路刦奪急當殲除臣令總兵官孫繼宗喀爾喀扎薩克通摩克等率兵抵喀喇淖爾聞賊逃往阿魯巴爾虎即進兵及之推默爾賊

兵拒戰為我兵所擊敗盡棄牛羊率其妻子遁
去奏入報

聞

命議防邊八事

撫遠大將軍年羹堯遵

旨議奏曰防守邊口八事一大兵駐巴里坤吐魯番地
久今策妄阿喇布坦恭順遣使事雖未竟而兵
可暫罷臣請於巴里坤吐魯番兵中選滿洲蒙

古綠旗兵二千人於巴里坤駐劄一千五百人
於吐魯番駐劄再令綠旗兵二千人駐劄哈密
餘兵悉罷之一布隆吉爾築城為駐兵防守之
界請令一總兵官統兵五千駐劄分為五營其
遊擊守備以下等官增設如例沙州去伊遜察
罕齊老圖口相近要害應分兵設一營駐劄
哈密地隘客兵無多請於巴里坤吐魯番所駐
兵撤後撥鎮標遊擊一人千總一人把總二人

兵五百人防守每年更代其駐兵新城乞

欽定嘉名以垂永久一布隆吉爾去嘉峪關五百餘里
口外募兵一時難集請以甘涼肅三州所罷兵
即駐其地其眷屬官為給路費遣往如兵缺以
營中餘丁選補一布隆吉爾駐劄官兵俸餉由
內地轉輸多費不便前者赤金衛柳溝所等處
嘗募人種地今請於每營撥餘丁二百每丁官
給牛二頭籽種四石口糧三石次年給半三年

但給籽種之半嗣後勿給其田即為耕者恒產
無論米麥青稞計收三石以為兵丁月糧一布
隆吉爾沙州請設官以理民事亦金靖逆二衛
舊設通判同知應令通判兼管二衛更於布隆
吉爾增設一衛守備沙州增設一千總令專管
種地事務其靖逆衛同知令移駐布隆吉爾並
屬肅州道統轄一肅州總兵官四營有兵三千
二百肅州居口內今大兵已駐劄布隆吉爾肅

州兵止於口內分守臺站事少應撥肅州鎮標
兵一營八百人往布隆吉爾再撥柳溝所兵一
百靖逆衛兵一百往益布隆吉爾軍靖逆衛設
一都司赤金及柳溝各設一千總並屬布隆吉
爾總兵官管轄一布隆吉爾沙州故蒙古地赤
金衛柳溝所嘗為蒙古部人游牧所出入方大
兵在外我軍士向已耕種駐劄其地若兵撤後
仍聽諸蒙古游牧往來或且爭競生事今布隆

吉爾南山中多隙地應遣大臣一人率賢能章
京往山中分地居之庶令内外地界明晰一寧
夏地廣土肥舊設總兵官駐劄遇哈密有事輒
自內撥滿洲兵赴之道遠甚無益按寧夏阿拉
善山外去哈密逼近宜令滿洲兵駐防寧夏其
駐兵若干及設官人數俟西寧事畢臣當審視
詳悉定議再奏奏入得

旨此事甚鉅著議政大臣等各抒已見詳加定議具奏

尋議曰撫遠大將軍年羹堯所奏八事詳晰俱應如所請奏入

上從之

辛丑

議行慶賀

禮部議曰青海搆逆天兵致勦二旬定之邊陲安輯大軍凱旋應如諸王大臣所請

皇上擇日陞殿行慶賀禮奏入得

旨此次平定青海實由我

皇考簡用將帥之得宜養育弁兵之有素伊等感恩効
力克奏膚功此皆

謨烈貽留宜可為朕有孚朕纘承

前烈守而弗違應行典禮勉從所請俟告祭

陵寢後擇日具奏

癸卯

撫遠大將軍年羹堯奏擒斬嘉木燦堪布等

年羹堯奏言據侍衛達鼐報三月初三日與副將紀成斌等搜勦羅卜藏丹津屬人謀知嘉木燦堪布喇嘛竄匿布代山後恐由西藏一路遁去遣人往調台吉濟木巴等撥蒙古兵於西藏邀截即率兵抵索羅穆逼之嘉木燦堪布等拒戰敗走我兵隨後勦殺濟木巴等間道迎賊擒斬嘉木燦堪布吹扎木素二人傳首軍營奏入報

聞

平定準噶爾方略前編卷十三

欽定四庫全書

平定準噶爾方略前編卷十四

雍正二年夏四月乙巳

叙平定青海功

大將軍年羹堯已授為一等公將軍岳鍾琪已
授為三等公外授叅贊蘇丹總兵官宋可進為
三等輕車都尉總兵官黃喜林為二等輕車都
尉按察使王景灝總兵官周瑛副將王嵩紀成

斌為騎都尉提督郝玉麟總兵官武正安為雲
騎尉以侍衛達鼎為副都統授騎都尉其餘有
功將士各擢賞有差

戊午

以青海平定功成

上御太和殿諸王貝勒貝子公文武百官以下上表行
慶賀禮

撫遠大將軍年羹堯奏擒阿布濟車陳台吉並

降喀爾喀扎薩克沙爾都台吉

年羹堯奏言侍衛達鼐副將紀成斌等率兵至
布哈色卜蘇擒獲阿布濟車陳台吉又喀爾喀
扎薩克沙爾都台吉來降奏入報

聞

丁卯

撫遠大將軍年羹堯奏勦定河州口外鐵布諸
番

年羹堯奏言河州口外鐵布等寨番人並青海
所屬刼掠道路猖狂妄行臣遺署河州副將岳
超龍等率兵進勦取四十一寨收服三十七寨
殺傷番賊二千一百餘人擒獲人口牲畜無算
悉實給官兵奏入報

聞

閏四月癸未

行獻俘受俘典禮

先是總理事務王大臣奏言青海大捷請獻俘
於

太廟

皇上親御午門受俘奏入得

旨平定青海實乃

皇考留貽之功故捷音到日恭告

景陵今造逆首惡吹喇克諾木齊阿喇卜坦溫布藏巴
札卜等三人檻送來京朕令議獻俘

太廟之禮以慰

列祖在

天之靈諸王大臣等乃議請受俘歸功於朕非朕本意
也可否祇行獻俘不行受俘之禮諸王大臣等再察
典禮具奏尋議曰出師凱旋執獲醜類獻於廟社即
受俘於廷歷代行之典禮甚鉅應請

允行奏入

上從之至是以平定青海所獲逆俘吹喇克諾木齊阿

喇卜坦溫布藏巴扎卜三人檻送至京行獻俘
禮遣官告祭

太廟

社稷越三日丙戌王以下文武百官齊集

午門前設鹵簿鳴金鼓

上御午門樓前楹升寶座受俘兵部官率楹送俘囚將
校以逆俘吹喇克諾木齊阿喇卜坦溫布藏巴
扎卜三人至白練擊頸跪伏兵部大臣奏言所

獲俘囚謹獻

闕下

上命交刑部於是刑部官領

旨兵部官引俘出王以下文武各官行禮畢

上回宮是日賜檻送俘囚官各蟒緞朝衣帽鞞加賞銀

百兩兵丁各賞銀二十兩

庚寅

命順承郡王世子弘晟還京

上諭總理事務王大臣等曰策妄阿喇布坦來使已回
胡土克圖處事務亦竣前令順承郡王世子弘晟在
彼守獲今既無事著伊等從容回京

五月庚申

撫遠大將軍年羹堯奏勦桌子山碁子山番賊
年羹堯奏言莊浪謝勒蘇部番人倡惡竊據桌
子山碁子山又涼州南崇寺沙瑪喇木扎卜等
與蒙古通去年輒劫掠新城張義諸堡又郭隆

寺郭莽寺喇嘛脫走者煽動西寧納朱公寺朝
天堂加爾多寺諸番與莊浪番賊構亂臣與奮
威將軍岳鍾琪及在西寧大臣等共議發綠旗
土司兵分十一路於四月十五日由西寧進兵
尋據岳鍾琪等報納朱公寺喇嘛番人悉降即
延小章嘉胡土克圖以朝天堂居之加爾多寺
諸番遣副將紀成斌張玉總兵官黃喜林等分
四路抵賊巢殺賊數百餘多死溝河中諸寺悉

燬又據報遊擊馬忠孝王大勳等殺賊於和石
溝遊擊王序吉范世雄敗賊於石門口涼莊道
蔣洄殲賊於喜逢堡而前鋒統領蘇丹率兵至
旁伯拉夏口番人詭辭來降蘇丹怪其踪跡令
偵之則賊衆伏鎗且發遂率兵直抵賊穴殺賊
甚衆又涼莊道蔣洄搜勦碁子山破賊於巴洞
溝土司魯華齡殺賊於天王溝前後勦賊略盡
其賊首謝勒蘇部阿旺策零為先密寺喇嘛縛

之至軍岳鍾琪又率兵至鎮羌謀賊在木茂山
即遣校率兵截殺賊大殲餘賊悉棄妻子逃去
乃留總兵官宋可進涼莊道蔣洄令統綠旗土
司兵五千暫駐防守又守備馬光於寬溝殺賊
二十餘人賊潰散又先密寺番人數反覆且其
地與碁子山賊穴相連恐後復聚為亂已令其
地喇嘛諸番移居於加爾多寺外其先密寺已
燬之此次陣亡被傷綠旗土司官兵及所招撫

諸番戶口數俟核明具冊咨部奏入得

旨桌子山碁子山番賊甚屬兇頑倚恃地方危險屢行
刦掠大將軍年羹堯籌畫調遣令奮威將軍岳鍾琪
等統率官兵進勦於山陰林密之處奮戰五十餘日
盡行勦滅黽勉効力克奏膚功永靖邊塞甚屬可嘉
此次勲績著將大將軍年羹堯及岳鍾琪等弁兵俱
從優議叙

辛酉

布隆吉爾副將軍阿喇衲有疾

命署固原提督噶爾弼署理以軍前正黃旗蒙古都統
蘇丹署理陝西固原提督以陝西西安左翼副
都統覺羅伊禮布署理陝西西安將軍

壬戌

命詳議青海善後事宜及禁約等事

上諭總理事務王大臣等曰自西陲逆賊羅卜藏丹津
等背棄國恩招集同惡殘其骨肉侵犯邊城朕命年

羹堯揆度機宜指麾將士犁庭掃漠迅奏膚功惟逆
賊犯塞之初邊民略被騷擾克敵之後居民安堵不
知有兵且士馬有飽騰之歡閭閻無轉運之苦支用
錢糧一無糜費昨因野番剽掠成性出沒無常又令
奮威將軍岳鍾琪領兵搜捕餘孽將士用命於深山
林木之中轉戰五十餘日俱已蕩平從此鋒鏑永清
疆圉開拓今具奏善後事宜十三條又定禁約青海
十二事運籌周密措置精詳朕心嘉悅之至其所奏

善後諸事皆合機宜惟新聞地方宜廣屯種而欲令
五省有罪之人發往開墾恐此等之人未必習於耕
種又無室家可以羈留於邊塞之處少當留意耳爾
等一併悉心妥議具奏尋議曰據撫遠大將軍年羹
堯條奏青海善後事宜十三條一奏言青海諸
部宜分別功罪以加賞罰前者羅卜藏丹津侵
犯內地時貝勒塞卜騰扎爾輒來告我消息及
賊人來犯西川南川未嘗助賊首率所屬來歸

台吉噶爾丹戴青亦始終不肯助賊且與貝勒
盆蘇克旺扎爾併力戰敗吹喇克諾木齊賊以
是就擒又隨大兵出口効力扎薩克阿喇卜坦
乃察罕丹津之婿隨大將軍進勦効力並請加
封爵以示獎勸應如所請塞卜騰扎爾晉封郡
王噶爾丹戴青封固山貝子阿喇卜坦封輔國
公又奏言俘獲諾顏格隆乃土爾扈特台吉今
已為喇嘛隨提督岳鍾琪軍効力貝勒盆蘇克

旺扎爾前雖從賊已而自悔歸命願擒賊贖罪
請與來降公策凌諾爾布留其前所封爵以示
寬大應如所請各復其爵又言輔國公羅卜藏
察罕台吉濟克濟扎卜雖降前與貝子阿喇卜
坦巴爾珠爾阿喇卜坦擾亂內地請奪其爵為
民貝勒策零敦多卜貝子拉察卜雖降前數助
逆賊並請降所封爵以示懲戒應如所請羅卜
藏察罕濟克濟扎卜奪爵為民策零敦多卜降

為固山貝子拉察卜降為鎮國公一奏言青海
部落宜令分別游牧居住請如內扎薩克編置
佐領以申約束每百戶置一佐領其不滿百戶
者為半佐領其台吉悉授扎薩克於其兄弟中
選授協理台吉每扎薩克設一協領一副協領
一叅領每佐領設一佐領一驍騎校四領催其
一旗有十佐領以上者增設一副協領二佐領
或增設一叅領如蒙

俞允請令一等侍衛副都統達鼎暫留辦理其每年會盟奏選其老成恭順者令充盟長不得私推以致滋事並應如所請一奏言朝貢交易宜立期定地請自雍正三年始於諸王台吉中定約人幾何自備馬駝由邊外入京朝貢令分青海諸王貝勒為三班三年一至九年一周其與內地交易則定以每年二月八月二次交易令俱集邊外臣相擇西寧西川邊外其地曰那喇薩喇

請定為中外互集之地不得移置屆期令總兵
官遣將校率兵督視如有擅入邊牆者治之應
如所請但諸蒙古所需茶葉布麪等物其交易
期遠恐窘乏應令四時交易一奏言羅卜藏丹
津屬人吹宰桑實率先歸順請令於松潘口外
駐牧授以土百戶銜丹忠部下宰桑噶隆塞卜
騰達什等率數百人至松潘來降今駐潘州請
授以千百戶官並應如所請一奏言喀爾喀厄

魯特四部宜勿隸青海按諸部既非被擄之人
今青海諸王台吉咸歸德來降其助逆者悉皆
擒獲而喀爾喀部隨軍降者所在多有宜乘我
軍威令凡喀爾喀部不願為青海屬者請如青
海例編旗各置佐領增設扎薩克等令分駐勦
賊故地其願歸者聽之如此則青海之勢分而
喀爾喀台吉等莫不感勵應如所請一奏言西
番部人宜屬內地管轄凡陝西所屬甘州涼州

莊浪西寧河州四川所屬松潘打箭爐里塘巴塘雲南所屬中甸等處並西番所在駐牧地自明以來失撫治之道或為喇嘛耕種地或為青海屬人交納租稅但知有蒙古而不知有廳衛營伍諸官今西番歸化悉為內民應相度地勢增設衛所以撫治之擇番人頭目心服於我者給予土司千百戶土司巡檢等銜令分管之并令附近道廳及增設衛所諸官管轄其應納糧

草較前所納數請減之以示寬大至近邊居帳
屋逐水草游牧者仍許其游牧均應如所請一
奏言青海所在宜加約束按青海巴爾喀木藏
危乃唐古忒四大部顧實汗據有之以青海地
宏敞可以牧養牲畜喀木人衆糧富遂令其子
孫分處二地嘗於青海游牧居處而喀木地納
貢賦焉藏危二地舊施子達賴喇嘛班禪喇嘛
供給香火今以青海叛盡取其地令四川雲南

諸官管理達賴喇嘛遣人到打箭爐貿易其駝
裝過察木多乍了巴塘里塘輒向所在喇嘛索
取銀各有差名曰鞍租至打箭爐為納稅用請
飭達賴喇嘛等不得收所在鞍租且請飭打箭
爐收稅官免其稅再每年請給達賴喇嘛茶葉
五千觔班禪喇嘛給減半均應如所請一奏言
喇嘛諸廟宜定例稽察西寧各廟喇嘛多者數
千少者五六百遂為藏垢納污之藪番民為喇

嘛納租稅與納貢無異而喇嘛輒私藏甲冑軍器前者羅卜藏丹津叛喇嘛輒率番民與大兵抗拒今臣於塔兒寺喇嘛選其老成者三百人給與大將軍印信執照諭以學習清規請嗣後定例廟舍不得過二百間喇嘛多者三百少者十餘人每年稽察二次令首領喇嘛具甘結給官至番民糧悉令地方官管理每年度各廟所用給發且加給喇嘛衣銀如此庶可分別良否

官得以時稽察諸廟應如所請一奏言陝西邊防宜嚴界限按邊外自黃河入中國處至河州西寧蘭州中衛寧夏榆林莊浪甘州其間水草豐美林麓茂密乃棄此不守以致蒙古諸部據大草灘地以常寧湖為牧廠以故所在相通更無阻礙請於西寧北川邊外上下白塔處自巴爾托海至扁都口一帶創築邊牆悉建城堡則西番部人妄行竊據之區悉為內地又肅州之

西洮賚河常瑪爾鄂敦塔拉等處膏腴之地應募民耕種自布隆吉爾修城駐兵後可漸致富饒至寧夏險要無過阿拉善山顧實汗諸孫及額駙阿寶等舊悉居山後游牧今或徒置山前請令阿寶等嚴飭所屬仍令各歸阿拉善山後則山前營盤水長流水等處悉為內地並應如所請一奏言甘州等處宜增設官按甘州西寧疆界相接應於此兩處設立營汛至青海巴爾

處鹽池自古屬內地後竟棄之塞外蒙古等至
西藏噶斯等處道必出此應速取之於新設邊
內大通河設一總兵兵三千管轄中左右三營
於大通河南設一叅將兵八百大通河北設一
遊擊兵八百鹽池設一副將及左右二都司兵
一千六百四川邊外單噶爾斯處移鎮海營叅
將兵一千駐劄再拉科閭們等處各設一守備
兵二百五十恒鈴子處移南川守備兵五百駐

劄其南川舊營留一千總兵百人至西寧宜改
設同知移西寧通判於鹽池駐劄令其辦理稅
務再河州保安堡應設一遊擊一千總一把總
兵四百歸德堡應增設一把總兵二百令悉隸
西寧總兵道員等管轄則蒙古不敢覬覦番民
有所依賴並應如所請一奏言打箭爐等處亦
宜增設各官青海既平凡巴爾喀木部人悉應
收集除羅隆宗以東察木多乍了等處並隸胡

土克圖管轄其餘諸番頭目悉應給與印信執
照令與內地土司同打箭爐外木雅吉達處請
設總兵遊擊守備以下等官兵二千人雅龍江
中渡處設一守備二千總兵五百里塘巴塘所
屬吹音等處設一守備兵二百里塘地當四衝
請設一副將一都司兵一千二百鄂羅為諸路
咽喉請設一叅將兵六百巴塘形勝要害請設
一遊擊兵五百宗都當雲南孔道請設一叅將

兵千人並令新設總兵官統轄以為雲南四川
兩省聲援又青海所屬左格諸番請亟移之內
地又阿巴土司頭目墨丹住等率兵進勦屢有
功請給與安撫司銜不隸青海管轄又黃勝關
外潘州舊城請設一遊擊兵六百阿巴地形山
河四繞請設一副將一都司兵一千五百黃河
兩岸渡口請設一守備兵三百悉隸松潘總兵
官統轄里塘增設一同知令掌軍糧收納番人

貢賦如此則南至雲南北至陝西皆可援助並
應如所請一奏言邊地軍士宜各歸併裁汰今
西寧設總兵官留兵四千便可足用請裁五百
歸大通鎮屬甘涼莊浪等處其餘營汛兵可裁
一千寧夏既增駐滿洲兵其綠旗兵亦可裁一
千改為四營以後營遊擊以下等官補入大通
鎮標四川重慶川北二鎮請設副將都司守備
千總把總等官裁二總兵六遊擊遵義夔州兩

協四遊擊亦請汰之化林一副將兵千人請改
置一遊擊留兵五百並應如所請一奏言邊內
地宜開墾屯種西寧邊牆以內田並可耕布隆
吉爾所在修築城垣請發直隸山西河南山東
陝西五省軍罪當遣者盡往大通布隆吉爾等
處墾種按今大通駐兵三千其子弟親戚及西
寧民人願往屯種者甚衆大通河可毋發往惟
布隆吉爾遠在邊外人不願往應如所請勅下

刑部並直隸山西河南山東陝西五省貪婪軍犯中除盜賊外有能種地者即發往布隆吉爾令地方官動支正帑買給牛具籽種三年後起科如例一奏言諸番部落宜加意撫綏今兵事竣臣當遵

旨回西安辦理三省事務暫令奮威將軍岳鍾琪駐劄西寧留兵四千令其統束其撫遠大將軍印信現今策妄阿喇布坦遣使請罪請俟撤回諸路

將軍時臣即繳上收貯內庫再甘州黃番諸部落乘我軍威召集撫綏亦可以禦青海臣與岳鍾琪議俟七八月馬匹肥壯親率兵由西寧口外到甘州招撫諸番並應如所請至年羹堯奏請禁約青海十二事一朝見入貢定以限期一不得自稱盟長一番子唐古忒部人勿令擾累一喀爾喀輝特土爾扈特部落不令青海據為屬下一編置佐領不許違拒一中外交易定地

約時以上六事臣等已於善後事宜內議定其餘六事一背貳者必勦一遣官捧

諭往者不論品秩崇卑王公以下跪迎餘相見以賓主禮一恪守分地不得強據一使者商賈往來毋劫掠一父沒不得娶繼母及強娶兄弟之妻一察罕諾們汗喇嘛廟中不得妄聚議事並應如所請奏入得

旨所議甚屬周詳依議

六月己卯

移殺虎口等處軍臺於張家口外

總管阿爾台路軍臺宗扎卜奏言阿爾台路軍臺四十七處除十二站不移如故其自殺虎口扎克拜達里克城所設軍營三十五站水草不佳道里迂遠請移設張家口外理藩院議覆如所請奏入

上從之

乙酉

命調都統丁壽還京

上諭總理事務王大臣等曰丁壽在軍前年久朕欲調
回另用著議奏尋議曰都統丁壽自阿爾台率兵往
巴里坤方今巴里坤有將軍富寧安吐魯番有
都統穆森統兵分駐請令丁壽以所率兵屬富
寧安就近遣大臣管轄令丁壽馳驛來京奏入
上從之

勒平定青海碑文於國學

禮部奏請

御製平定青海碑文勒石國學頒行天下以昭功德

御製碑文曰我國家受

天眷命撫臨八極日月所照罔不臣順遐邇乂安兆人
蒙福乃有羅卜藏丹津者其先世顧實汗自國初稽
首歸命當時使臣建議畀以駐牧之地其居雜番羌
密近甘涼我

皇上聖祖仁皇帝睿慮深遠每厯於懷既

親御六師平定朔漠威靈所加青海部落扎什巴圖爾
等震聳承命

聖祖仁皇帝因沛殊恩封為親王兄弟八人咸錫爵祿
羈縻包容示以寬大而狼心梟性不可以德義化三
十年來包藏異志朕紹登寶位優之錫賚榮其封號
尚冀革心緝寧部衆而羅卜藏丹津昏謬狂悖同黨
吹喇克諾木齊阿喇卜坦溫布藏巴扎卜等實為元

惡謂國家方宏浩蕩之恩不設嚴密之備誕敢首造
逆謀迫脅番羌侵犯邊城反狀彰露用不可釋於天
誅遂命川陝總督太保公年羹堯為撫遠大將軍聲
罪致討以雍正元年十月師出塞自冬涉春屢破其
衆凡同叛之部落戈鋌所指應時摧敗招降數十萬
衆又降其貝勒貝子公台吉等二十餘人朕猶閔其
蠢愚若悔禍思愆束手來歸尚可全宥而怙惡不悛
負險抗違乃決翦滅之計以方略密付大將軍年羹

堯調度軍謀簡稽將士用四川提督岳鍾琪為奮威
將軍於仲春初旬禡牙徂征分道深入搗其窟穴電
掃風馳搜剔巖阻賊徒倉皇糜潰窮蹙失據羅卜藏
丹津之母及謀逆渠魁悉就俘執擒獲賊衆累萬牲
畜軍械不可數計賊首逃遁我師踰險窮追獲其輜
重人口殆盡羅卜藏丹津子身易服竄匿荒山殘喘
待斃自二月八日至二十有二日僅旬有五日軍士
無久役之勞內地無轉輸之費克奏膚功永清西徼

三月之朔奏凱旋旅饒歌喧轟士衆訡喜四月十有
二日以倡逆之吹喇克諾木齊等三人獻俘

廟

社受俘之日臣民稱慶伏念

聖祖仁皇帝威靈震於遐方福慶流於奕葉用克張皇
六師殄滅狂賊行間將士亦由感激

湛恩厚澤為朕踴躍用命斯役也芟夷凶悖綏靖番羌
俾烽燧永息中外人民胥享安阜實成

先志以懋有不績廷臣上言稽古典禮出征而受成於
學所以定兵謀也獻馘而釋奠於學所以告凱捷也
宜刊諸珉石揭於太學用昭示於無極遂為之銘曰
天有雷霆聖作弧矢輔仁而行威遠寧邇維此青海
種類實繁錫之茅土列在藩垣被我寵光位崇祿富
負其阻遐禍心潛構恭惟

聖祖慮遠智周瞻念荒服綏撫懷柔朔野既清西陲攸
震爵號洊加示之恩信如何兇狡造謀逆天鼓動昏

懃寇侵於邊惟彼有罪自干天罰桓桓虎貔爰張九
伐王師即路冬雪初零日耀組練雷響輦鉦蠢茲不
順敢逆戎旅奮張螳臂以當齊斧止如山嶽疾如雨
風我戰則克賊壘其空彼昏終迷曾不悔戾當翦而
滅斯焉決計厲兵簡將往擣其巢踰厯欽嶇坦若垌
郊賊棄其家我繫而獲牛馬谷量器仗山積蹇兔失
窟何所遁逃枯魚游釜假息煎熬師以順動神明所
福旬日凱歸不疾而速殪彼逆謀懸首藁街獻俘成

禮金鼓調諧西域所瞻此惟雄特天討既申羣酋惕
息橐戈偃革告成辟雍聲教遐暨萬國來同惟我
聖祖親平大漠魏功煥文邁桓軼酌流光悠久視此銘
辭繼志述事念茲在茲

辛丑

撫遠大將軍年羹堯奏移降番噶住等於司
魯華齡處并撤進勦官兵

年羹堯奏言據岳鍾琪報進勦碁子山桌子山

謝勒蘇所屬諸番殺傷賊目班第瑪雅及賊衆
餘悉奔竄山中即遣署總兵官宋可進統兵進
勦賊番頭目噶住率男婦老弱一千一百六十
二人來降已受之但仍居桌子山恐日久生事
請移於土司魯華齡處令其約束其四川陝西
綠旗土司官兵已撤回奏入報

聞

八月乙亥

撫遠大將軍年羹堯奏雙蓬諸番來降進勦拉
扁二寨

年羹堯奏言據岳鍾琪報副將張玉率綠旗土
司官兵出口至歸德堡其雙蓬攢都澤蓋博拉
諸番頭目各以其屬來降兵至薩喇分二路進
勦拉扁上下二寨殺傷回賊無算撫其餘人安
插如舊奏入報

聞

丙子

撤駐劄涼州等處兵

撫遠大將軍年羹堯奏言平定青海功成前者
調集駐防涼州等處西安滿洲兵一千白柴達
木調還察哈爾兵一百駐劄松潘所在四川滿
洲兵五百駐劄甘州鄂爾多斯土默特兵一千
駐劄山丹大同兵一千駐劄布隆吉爾滿洲蒙
古烏拉索倫察哈爾厄魯特兵二千悉令原管

將校陸續統領撤回奏入報

聞

戊戌

命議叙勦撫歸德至松潘口外諸番功

上諭兵部曰青海既平之後涼州莊浪所有賊番以次
勦撫官兵効力歷著功勲今大將軍年羹堯等奏稱
乘川兵回汎之便並將歸德至松潘口外一帶番族
或勦或撫悉無梗化殊屬可嘉在事有功人員著於

勦撫桌子山之外另行議叙

九月辛丑

特給丁壽騎都尉世職

上諭總理事務王大臣等曰阿爾台處軍事已竣著將
軍功議叙將軍丁壽特給騎都尉世襲罔替議叙時
仍照伊應得爵級歸併計算

癸卯

命停捐納事例

上諭總理事務王大臣等曰開例捐納少助軍需原屬一時權宜非可行之久遠

皇考曾屢言捐納非美事朕纘承大統亦以軍需浩繁戶部供支不繼捐納事例仍暫開收今仰賴

皇考在天之靈西邊軍務將已告竣即現有需用錢糧之處為數無多著將戶部與陝西各項事例即行停止其運糧赴巴里坤及肅州所動西安藩庫銀兩悉作正項報銷

平定準噶爾方略前編卷十四